

25/07/2002

Kerajaan terus dedah keburukan pemimpin Pas

KUALA LUMPUR, Rabu - Kerajaan akan meneruskan agenda mendedahkan keburukan pemimpin Pas melalui siaran televisyen dari semasa ke semasa, kata Setiausaha Parlimen Kementerian Penerangan, Datuk Zainuddin Maidin.

Katanya, menerusi cara itu rakyat dapat menilai keperibadian pemimpin pembangkang itu, yang memperalatkan agama untuk politik mereka..

Sehubungan itu, Zainuddin menolak pandangan kononnya tindakan Radio Televisyen Malaysia (RTM) membuat pendedahan mengenai keburukan peribadi pemimpin Pas, boleh menyebabkan berlaku 'media overkill' atau senjata makan diri.

Beliau sebaliknya berkata, pendedahan itu, seperti menyiarkan ucapan Ahli Parlimen Kuala Kedah, Mohamad Sabu, memaki Perdana Menteri, Datuk Seri Dr Mahathir Mohamad, menyebabkan rakyat jelek dan benci melihat telatah pemimpin Pas itu.

Zainuddin berkata demikian pada sidang akhbar di sini hari ini bagi mengulas pandangan ruangan pojok, Awang Sulung dalam Mingguan Malaysia, Ahad lalu, liputan media yang lebih banyak menyebelahi Barisan Nasional (BN) pada pilihan raya kecil Pendang dan Anak Bukit, tidak berkesan dari segi mengubah hati penyokong pembangkang.

Ruangan itu turut memetik Setiausaha Agung DAP, Kerk Kim Hock, yang menggunakan istilah 'media overkill' ketika mengulas penggunaan media secara keterlaluan pada kempen pilihan raya itu.

Zainudin berkata, pada pilihan raya kecil Anak Bukit dan Pendang, wujud kebangkitan generasi muda yang komited terhadap Umno serta dasar kerajaan, dan perkara itu tidak berlaku pada pilihan raya umum 1999.

Berikutan itu, katanya, usaha mendedahkan keburukan pembangkang akan diteruskan.

Katanya, sikap fanatik pemimpin Pas menyebabkan masyarakat bukan Islam melihat Islam versi Pas sesuatu yang menakutkan.

Oleh itu, katanya, semua media massa perdana termasuk media elektronik perlu berani menyerang balas jika diserang dan tidak perlu takut dengan ugutan dipulaukan pembaca.